

^a Conc. Tolet. Sub
Gundemaro,

^b Decret. Gunde-
mari ad calcem
Conc. Tol.

VII.
HISPALIS ME-
TROPOLIS BÆ-
TICÆ PROVIN-
CIÆ.
^c Plin. lib. 3. c. 1.
^d Isidor. in Ori-
gin.

nullatenus dubitare valeo. Nec parum fauere videtur Carthagini Euphemij Toletani subscriptio, qui se tantum Prouinciæ Carpetaniæ Metropolitam dixit in Concilio tertio Toletano. At numquid istud clare testatur^a contentio inter Toletanum Archiepiscopum & Episcopos Prouinciæ Carthaginensis, quorum ciuitates extra Carpetaniam erant? Hi cum à pluribus sæculis subiecti fuissent Episcopo Carthaginensi, Toletano, quantumuis huic Reges Gothi fauerent, subesse noluerunt, asserentes se ex Prouincia Carthaginensi, Toletanum autem Episcopum Metropolitam solius Carpetaniæ Prouinciæ, ideoque nec huic nisi contra Canones obedire posse. His tamen obstare volunt, in gratiam Toletani Episcopi, decretum à Gundemaro Rege, in conuentu, quem pro definienda contentione illa Toleti anno 610. fieri curauit, editum; & quo dignitas Metropolitana prorsus Carthaginensi Episcopo denegata est, concessaque Toletano, iuxta (vt in eo dicitur) antiquos Patrum canones, non tantum in Episcopos Prouinciæ Carpetaniæ, sed etiam in omnes totius Carthaginensis. Decreti verba sunt^b [Illud autem, quod iam pridem in generali Synodo Concilij Toletani, à venerabili Euphemio Episcopo, manus subscriptione notatum est, Carpetaniæ Prouinciæ Toletanam esse sedem Metropolim, nos eiusdem ignorantia sententiam corrigimus: scientes proculdubio Carpetaniæ regionem non esse Prouinciā, sed partem Carthaginensis Prouinciæ, iuxta quod & antiqua rerum gestarum monumenta declarant. Ob hoc, quia vna eademque Prouincia est, decernimus, vt sicut Bætica, Lusitania, vel Tarraconensis Prouincia, vel reliquæ ad regni nostri regimina pertinentes, secundum antiqua Patrum decreta, singulos noscuntur habere Metropolitanos, ita & Carthaginensis prouincia vnum eundemque, quem prisca Synodalis declarat auctoritas, & veneretur Primatem, & inter omnes comprouinciales summum honoret Antistitem: neque quicquam contempto eodem ultra fiat, qualia hactenus arrogatum Sacerdotum superba tētauit præsumptio.] Certè si Decreto illi credamus, Primatum Toletano tribuendum non Carthagini quis non videt? At mihi tātō magis suspectæ fidei est, quod Hector subscribens Tarraconensi Concilio Carthaginem Metropolim dixerit, & Euphemius non nisi Carpetaniæ se Metropolitam scribat. Adde quod Decretum istud Carthaginensem Prouinciā eandem cum Carpetania faciat, licet apud Geographos omnino diuersa sit: Hinc enim, an potius ex auctoritate Gundemari Regis quam ex rei veritate editum sit, locus dubitandi est.

Hispalis, quæ & olim Spalis dicta est, Hispaniæ Bæticiæ Metropolis, diuque Gothorum sedes, qui ex ea regum Thronum Toletum sub Leuigildo rege circa annum 586 transfulerunt. Dicitur alio nomine à Plinio^c Colonia Romulienfis. Hispalim autem dictam vult Isidorus^d à situ, eo quod in solo palustri, suffixis in profundo palis, locata sit: sed an huius nominis originem gratis fingat prudens lector iudex sit. Ego hanc Metropolim Ecclesiasticam fuisse, non tantum ex antiquioribus Notitijs Ecclesiasticis Hispaniæ, quibus semper hoc honoris titulo donatur, sed etiā ex subscriptione Beati Leandri, quæ in fine Concilij tertij Toletani sic legitur, probabo: [Leander in Christi nomine Ecclesiæ Spalensis Metropolitanus Prouinciæ Bæticiæ, his constitutionibus, quibus in vrbe Toletana interfui, annuens subscripsi.] Præterea cum sedes Regum esset, totius diœcesis Hispaniarum primaria etiam multo tempore